

# Oberfläche Goofe

## Einzug

Mer send d'Oberfläckegoofe,  
singed was das Jahr esch gloffe.  
Mer send d'Oberfläckegoofe,  
singed was das Jahr esch gloffe.



## Badenfahrt platz

*Melodie: s'Buurebüebli (Volkslied)*  
Eb obe oder unde, eb alt oder neu,  
z'Bade tüends all 10 Jahr wie die wilde Säu.  
Es goht nöm hinderschi ond nöm vor,  
die Mänschemasse bringsch ned dors Tor.

Mol före mol hindere mol links mol rächts  
mol ufe mol abe mol links mol rächts  
mol före mol hindere mol links mol rächts  
mol ufe mol abe mol links mol rächts.

S'gröschti Volksfäscht vo de Schwiiz  
es hät alls ond niemert giizt.  
För de Platz, wo fehlt, hättet mer en Idee:  
Bringet d'Badefahrt doch of Züri an See...



## Spruch

Vor 500 Jahr hät de Pfarrer vo Wittenberg sini  
These ane Chiletür anebosticht.  
Wänn höt öper us religiösem Ifer en Aschlag  
macht, dänn wird's Luther!


Apropos Terrorismus....di Katholisch Chile esch  
echli am Aschlag, die wänd sech jenz au  
reformiere.  
De Papst will zwoi Wörter im Vater unser ändere.  
Es heisst jetz nöme «Vater unser», sondern «dini  
Muetter»!

## Volatile Politik

*Melodie: Ciao Ciao Svizzera (André Sturzinger)*  
De Donald esch a de Macht.  
Hät scho meh als jede gmacht.  
Mit Fingerpüür regiert er sacht,  
doch d'Sorge drucked schwär.

Er brucht es neus Cabaret...ähh Kabinet,  
s'Alte macht ned was er wet.  
Er brucht es neus Kabinet,  
wo ehm nach de Schnörre red.

Eifach esch das ned z'becho,  
die falsche muess er links ligge loh.  
Eb er di rechtige häd gnoh,  
sortiert er täglich neu.



Ide Schwizer Politik  
handled au ned all mit Gschick  
Burkhalter, Yannik, Jonas Fricker,  
fö'r'e Rücktritt bruchsch bald en Live-Ticker.

## Spruch

*De Bundesrot investiert i d Kunst.*  
*De Maler vom Bundesratsbild 2018,*  
*freut sich über d'Gunst.*  
*Debi esch Eigenutz d'Motivation vo de*  
*Bundesrotslüt, jetzt cha niemert me säge:*  
*Im Bundeshus bewegt sech nüt!*

## Schwöschtere Brutchleid (Zurzach)

*Melodie: Dr Eskimo (Mani Matter)*  
Känned ehr das Gschichtli scho,  
vo de Schwöschter Kriimhild,  
wo in Zurzi eifach so  
nöm e eres Chleid esch cho.



Sie wet dank em Radio  
zom ne Umstandschleidli cho.  
Mer Goofe schlüssed drus: ach so,  
d'Krimhild esch under d'Hube cho.

Trurig wäred mer Goofe scho  
wörd sie nöm do here cho.  
Was wäri denn die Fasnacht do  
ohni ehres ..... Niveau.

## Hauptsach Geri Müller

*Melodie: Dr Eskimo (Mani Matter)*  
Känned ehr das Gschichtli scho  
vo dem arme Geri Müller,  
wo in Bade eifach so  
nöme esch is Stadtamt cho?  
Mer froged eus ned, wieso  
esch er nöme inecho.  
Mer händs halt ned chöne loh,  
hauptsach er esch of d'Helge cho.



## Wo esch Bez (Zurzach)

*Melodie: Det äne am Bergli*  
Det äne näbet Döttige, det stoht es Schuelhus.  
De Goschteli wott es eigets ond scho esch  
Verdruss.  
Nach vellem debattiere, isch alles scho gseit.  
Öb döt oder däne s'esch eineweg ned gseit.

Holeduli duli duli  
Hole duli duli duli  
Holeduli duli duli  
Hole duli duli duli



Debi händ mer es Plakat gseh, wo d'Lösig i sech  
treit.

D' MOBILIAR zum sponsere, wär dänn au bereit.  
Sie wet nur dörfe säge, wo d'OSA anegoht.  
Zur Uswahl Kad Zurzach o-der Boblitz stoht.



## Integration und Stadtrat

Melodie: Dr Sidi Abdl Assar (Mani Matter)

Es zeigt sich halt es tuet eifach ned lange,  
wenns'ganzi Läbe z'Buchd id Schuel besch gange.  
Ebeso nützts nüt,  
chasch d'Sprach vo Land und Lüt,  
ach wärisch nur im Dorf zum Metzger gange.

### Spruch:

Sötsch du also Vegi si—ziesch besser ned det hi.

### Spruch:

Integration isch Geschter gsi—hüt bisch nur mit  
Inklusion derbi.

D' Buchser Ibürgerigskommision hät das sehr  
wörtlich gno.

Und au s'Badener Stimmvolk, hät ned alli ineglo.

Es zeigt sech halt es tuet eifach ned lange,  
wänd mit em Velo gosch go Stimme fange.  
Ebeso nützts nüt,  
verlosch du dini Lüt,  
drom hämer z'Bade jetzt en Schneider-Ammä.

## Papa Moll Film

(Meiteli wenn du wetsch go Tanze)

Möchtisch du en Filmstar werde,  
gang du nor uf Bad Zurzach.

S'brucht Statische, s'brucht e Wiese,  
das verzellt ganz gross, ganz gross d'Botschaft.

Der Papa Moll, de werd verfilmed.  
Papa! Papa! Das werd toll.  
Ond mit bitzli Product Placement  
werd hoffentlich au s'Bad mol voll.

Der Papa Moll, de werd verfilmed.  
Papa! Papa! Das werd toll.  
Ond dank es paar hübsche Manne  
werd das Bad dänn voll.

Zorzi tuet de Film ned begeischtere,  
Zorzi hät da gar kei Spass.  
Be Murmelinger Ortsufnahme  
erkänsch nor e Badner Gass.



Mer hand ghört, die Dütsche rüefed:  
“Dieser Film, der fehlt uns noch.”  
D'Übersetzig vom Filmtitel  
esch bekannt, s'esch: “Papa Doch”.

Doch leider wörkt das Product-Placement  
ned ganz bis Amerika.  
Mer send froh, drom triffsch de Trump  
z'Davos anstatt in Zurzi a.

## Fuchsjagd (Zurzach)

Melodie: Lueged ned ume, de Fuchs goht ome  
Lueg guet ume,  
Depotbecher stönd ume.  
Loh sie ned gammlle,  
es lohnt sich sie z'sammle.  
Es häd au vel im Baumhus,  
lueg, det nemmt sie eine Stapelwis drus!  
Do werd de Fuchs zum Star  
und hechtet über d'Bar.


Woher esch er so fit?  
Macht er bem Von Arx mit?  
Nei de Reto esch kein Liechtathletikjünger.  
Sis Amt würkt wie Dünger.  
Als Politiker nemmt er so vel in Chauf,  
deför isch er de bescht Be – Hürdelaufl.

## Baden ist sparsam (Baden)

Melodie: Ir Isebahn (Mani Matter)  
Im Iwohnerrat stimmed die einte eso,  
dass sie alls wo was choschtet,  
grad wännnd weglah.  
Und de Ruggie zue chered, was e Stadt so sött ha.  
Füllema.

Die andere stieged uf das ned gern i.  
Au s'Volk schloht a de Urne, en andre Weg i.  
Und seit: Be meh Bildig, sind mer debii.  
Burghalde.

Trotzdem söll d'Stadt spare, so ei-zwoi Million  
Mer hättet en Vorschlag, fürd Begleitkommission.  
Im Trafo d'Miss-Schweiz-Wahl, hät Spartradition.  
Knapp-agleit.



## Ohni

Melodie: Heicho (Sternä Föifi)

Mer Goofe wänd e Zuekunft  
ond no lang uf dere Erde bliebe.  
Drom läbed mer eso,  
dass mer d'Menscheit ned vertriebe.

Bio, Bio,  
esch alles wo mer poschtet.  
Nor vo schwizer Bure,  
ganz egal was es choschtet.

De Abfall tüend mer tränne,  
sammelt Papier, Karton und PET.  
Schleickeds Altglas zo de Mulde  
ond zerleged alls komplett.

Tränne, tränne  
ond alles schön sortiere.  
So wänd mer eusne Goofe  
no en Erde garantiere.

Ehr gsänd, euses Läbe  
häd Konzept ond esch dordacht.  
Jetzt hämmer ghört in Bade,  
häd en neue Lade ufgmacht.

Ohni, ohni  
das heisst es esch ned verpackt.  
De Schlei esch sofort go poschte,  
doch d'Verchäuferi esch gar ned nackt.

### Spruch:

Wär sie aber nackt gsi- im LWB z'Bade, wär sie  
voll debi...

## Abdankung

S'esch skandalös,  
s'esch bodebö, s'esch schuderbar  
Aber s'esch wahr.

